

Gion Antoni Derungs – l'orfeus rumantsch

■ (cp) Il renumà cumponist cun irradiaziun naziunala ed internaziunala Gion Antoni Derungs (1935–2012) savess festivar quest onn ses 80avel anniversari. El è stà in cumponist incunparegliabel en tut ils regards ed ha contribuì ovras da gronda muntada da bunamain tut ils genres musicals: da chanzuns «simplas» ad oratoris, operas, concerts instrumentals e sinfonias. Ils concerts a Berna, Constanza e Turitg vulan derasar la musica da Gion Antoni Derungs e render pli enconuschent il cumponist rumantsch/grischun en Svizra.

Paletta da concerts

L'intermediatur da la cultura musicala rumantscha è era suenter sia mort a la testa dals cumponists rumantschs. El influenzescha anc ozendi fitg la musica. Las ovras dal cumponist Gion Antoni Derungs tutgan tar il bain cultural dal Grischun. Er en l'exteriur – en l'Ucraina, la Moldavia, la Russia, la Siria, etc. – èn sias ovras vegnidas represchentadas. Per la festa da commemoraziun 100 onns Henry Dunant, il fundatur da la Crusch cotschna svizra, ha el cumponì la musica tar in text da l'antierur cusseglier federal Hans-Rudolf Merz – preschentada sco ovra scenica musicala a Heiden l'onn 2010.

Sia ovra è vegnida influenzada da l'idiomatica da la musica populara rumantscha. Ma el ha transfurmà ed interpretà ils elements tradiziunals a moda creativa. El è stà in avantgardist en blers regards.

Per render pli enconuschenta sia ovra organisescha la Fundaziun Gion Antoni Derungs il 2015 trais concerts cun la



Il cumponist svizzer cun ragischs rumantschas Gion Antoni Derungs cumpleniss quest onn 80 onns.

FOTO P. DE JONG

Südwestdeutsche Philharmonie da Constanza; in concert commemorativ-festiv a Berna ils 2 da zercladur en il Kultur Casino cun la primaudiziun da la 6. sinfonia «La Romantica», mintgamai in concert ils 10 da november a Constanza ed ils 11 da november a Turitg, nua che sias sinfonias stattan en il center. Avant ils concerts vegn represchentada ina scena da musica biografica «Gion Antoni Derungs – Orpheus dils Retoromans» che tracta da Gion Antoni Derungs sco

cumponist. Ils 17 da fanadur vegn el er undrà a Vella en Lumnezia, ses vitg natal.

Cun il concert festiv en il rom da la Festa svizra da chant a Meiringen cun ina gronda part da chanzuns da Gion Antoni Derungs en ils programs dals chors grischuns ils 13 da zercladur, l'opera «Benjamin» durant il Festival Origen la stad ed il concert da la Kammerphilharmonie Grischun ils 6 da settember, datti numerusas chaschuns da tadlar e giudair las ovras da Gion Antoni Derungs.

Ediziun da chanzuns e catalog da las ovras

Gion Antoni Derungs ha cumponì in'ovra da chanzuns fitg vasta e multifara. Ma i manca in'ediziun sistematica da questas chanzuns. Ellas vegnan uss assortidas ed edidas il 2015. Er ina banca da datas cumplexiva per l'ovra cumpositorica cumpletta da Gion Antoni Derungs vegn creada ed actualisada. Ella vegn messa a disposiziun ad interessads sin www.gionantoniderungs.ch

Datas da concerts

Datas e lieus dals concerts e da las represchentaziuns per la commemoraziun da Gion Antoni Derungs 2015. Ulteriurs concerts ed ulteriuras represchentaziuns chattais Vus sin www.gionantoniderungs.ch

Mardi, ils 2 da zercladur 2015

19.00, Burgerratssaal, Kultur Casino Berna: «Gion Antoni Derungs, Orpheus der Rätoromanen»

20.00, Grosser Saal, Kultur Casino Berna: concert festiv

Sonda, ils 13 da zercladur 2015

20.15, St. Michaelskirche, Meiringen: concert festiv dals trais chors virils ils pli gronds dal Grischun

Sonda, ils 20 da zercladur 2015

19.00, curtin da la curt interna da la claustra, Fischingen: serenada

Venderdi, ils 26 da zercladur 2015

19.30, curtin da la curt interna dal Löwenhof, Rheineck: serenada

Venderdi, ils 17 da fanadur 2015

20.00, halla polivalenta, Vella: «Orpheus der Rätoromanen», scena da musica biografica
21.00, Origen, Clavadeira, Riom: opera «Benjamin»

Dumengia, ils 6 da settember 2015

17.00, Teater Cuira: concert Kammerphilharmonie Grischun / Cantus Firmus Surselva

Venderdi, ils 23 d'october 2015

20.00, Marianensaal, Lucerna: «Orpheus der Rätoromanen», scena da musica biografica
Dumengia, ils 25 d'october 2015

18.00, Teater Rigiblick, Turitg: «Orpheus der Rätoromanen», scena da musica biografica

Mardi, ils 10 da november 2015

19.00, Lutherkirche, Constanza: «Orpheus der Rätoromanen», scena da musica biografica
20.00, Lutherkirche, Constanza: concert sinfonic

Mesemna, ils 11 da november

20.00, baselgia St. Peter, Turitg: concert sinfonic